

Tortoreto

I.

Ab lo pascor m'es bel q'eu chant,
en estiu, a l'entran de mai,
can par la flors sobre·l verjan,
e son reverdezit li glai;
mout mi val pauc lo temps cortes,
q'eu non ai joi ni non l'ades,
ni de sa compaignia no·m lau.

II.

Per qe d'amor an atretan
li malvas enojos, savai,
con li meillor e·l plus prezan.
Jovenz en faill, fraing e dechai
e Malvestatz a son luec pres
en amistat, c'amics non es
amatz ni d'amigua no·s jau.

III.

Ben sai qe lor es mal estan
als moilleratz car se fan gai
domnejador ni drudejan,
e·l guizado qe lor n'eschai
ditz el reprocher lo pajes:
?Qi glazi trai a glazi es
feritz d'eis lo seu colp mortau.?

IV.

Fals amador, al meu semblan,
vostr' er lo danz e no·n pueis mai;
de gran folor es acordan
can l'us l'autre gali? e trai;
e, pos vos o aves enques,
drut, moiller et marit, tug tres,
sias del pechat comunau.

V.

El fuec major seretz arden
al juzizi del derrer plai,
enganador, fel, desleian,
en la pena qe no trasvai,
on sera totz lo mals e·l bes
judicatz; e non clam merces

donna c?aja drut desleiau.

VI.

Non a valor d?aissi enan
cela, c?ab dos ni ab tres jai;
et ai·n encor lo cor tristan,
qe Dieus tan falsa no·n fetz sai;
miels li fora ja non nasques
enanz qe failliment fezes,
don er parlat tro en Peitau.

VII.

Saint Salvador fai m?albergan
lai, el regne on mi donz estai,
ab la genzor, si q?en baizan
sien nostre coven verai
e qe·m do zo qe m?a promes;
pueis al jorn s?en ira conques,
si be l?es mal al gelos brau.

VIII.

Amics, diguas li·m, can la ves,
si passa·l terme q?avem pres,
q?ieu soi mortz, per Sain Nicolau!

- letto 461 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/tortoreto-0>